

09 JAN 2000

Abdullah-Tanding

ABDULLAH SEDIA HADAPI PERTANDINGAN UNTUK TIMBALAN PRESIDEN

KEPALA BATAS, 9 Jan (Bernama) -- Naib Presiden Umno Datuk Seri Abdullah Ahmad Badawi hari ini berkata, beliau sedia bertanding bagi jawatan timbalan presiden parti jika bahagian-bahagian Umno mahukan pertandingan bagi jawatan itu pada pemilihan parti Mei depan.

Katanya, terpulang kepada bahagian-bahagian UMNO untuk membuat keputusan sama ada menerima nasihat Majlis Tertinggi (MT) agar jawatan presiden dan timbalan presiden tidak dipertandingkan atau sebaliknya.

"Saya tetap tawarkan diri untuk bertanding," kata Abdullah kepada pemberita di majlis rumah terbuka Hari Raya beliau di kediamannya di sini.

MT dalam mesyuaratnya pada 3 Jan lepas memutuskan supaya Presiden Umno Datuk Seri Dr Mahathir Mohamad dikekalkan pada jawatannya manakala Abdullah dicalonkan untuk jawatan Timbalan Presiden. MT juga meminta agar kedua-dua jawatan itu tidak dipertandingkan.

Abdullah yang menjalankan tugas-tugas timbalan presiden berkata demikian sebagai mengulas desas-desus kononnya terdapat bahagian yang meminta agar jawatan Timbalan Presiden itu dipertandingkan.

Abdullah yang juga Timbalan Perdana Menteri berkata, keputusan Majlis Tertinggi (MT) untuk meminta kedua-dua jawatan utama dalam parti itu tidak dipertandingkan sebenarnya adalah satu nasihat dan pandangan.

"Keputusan sebenar adalah di tangan bahagian-bahagian dan terpulanglah kepada mereka untuk mendengar nasihat atau tidak demi perpaduan parti," katanya.

Dr Mahathir sendiri telah menjelaskan mengenai keputusan MT itu dan keputusan MT itu bukanlah satu keputusan muktamad ataupun syor presiden, katanya.

"Ia dicadang oleh seorang anggota MT dan kemudiannya ramai anggota MT turut memberi pandangan yang sama dan itulah yang sebenarnya berlaku."

Kalau ada bahagian yang ingin jawatan timbalan presiden itu dipertandingkan terserahlah kepada mereka tetapi yang penting ialah orang yang mereka calonkan itu mesti berkebolehan.

Terdahulu itu, beliau meraikan kira-kira 10,000 orang termasuk Yang Dipertua Negeri Tun Dr Hamdan Sheikh Tahir, Ketua Menteri Tan Sri Dr Koh Tsu Koon serta kesemua pemimpin parti-parti komponen Barisan Nasional (BN) di majlis rumah terbuka itu.

-- BERNAMA

AA PR